



FASNACHTSCLIQUE
JUNTERESSLI

Fasnacht 2013

Higgs Higgs Hurra!

**Jesus Christ Superstar,
Do you think you're what they say you are?**

Higgs Higgs Hurra! Jetzt hänn si s gfunde und uff dr Stell macht d Nooricht d Runde: Bym Urknall isch die Wält entstande und daas haa-n-ych esoo verstande: My Vadder het die Wält nit gschaffe, nit s Meer, nit s Land, nit d Balm, nit d Afte. Drum hänn si glooge, schwaarz uff wyss, im erschte Buech vo Genesis. Glaar, syt em Peter Higgs sym Dail danzt d Foorschig uff em hooche Sail und dass sii d Schepfig kaa bewyysen stirtz d Religione in e Krise. Die stelle sich mit Schrägge voor me hätt scho voor zwaudausig Joor s Higgs-Daili gfunde und dernoo sii gaar nit bruucht zem d Wält verstoo. Daas haisst s hät kain e Biible gschriibe, dr Schryyner wäär e Schryyner bliibe. D Maria hätt kai Zimmer gsuecht, kai Wiirt hätt iiber Fremdi gfluecht. Dr Nero hätti wyter gfrässe und d Buebe z Bethlehem vergässe. Ych wäär nie iiber s Wasser gloffe, kai Lahme hätti deerfe hoffe. Au dr Pilatus, soo-n-e Fläsche, hätt d Deepe nit in Unschuld gwäsche und mii dernoo wenn s blitzt und haagled uff Golgatha an s Holzkryz gnaagled. Gäll, dänggsch jetzt au, s isch eppis draa: Statt Religion – Higgs Higgs Hurra!

S wäär sicher nie zue Gryzziig koo, me hät die and're lääbe loo. Me hätti au kai Häx verbrennt, hät me daas Higgs-Dail friehner kennt. Kai Nonne hät, bivoor si s letscht Mool hucht, verroote kenne, wäär het sii missbrucht. S gäbt ganz bestimmt kai Pascht in Room, derfiir me Umsatz mit Kondom. Gäll, dänggsch jetzt au, s isch eppis draa: Statt Religion – Higgs Higgs Hurra!

S gääbt kaini Kiirche, kaini Gleeschter, kai Zölibat fir Seeledreeschter. Me miesst nimm Kirchestüüre zahle, kai Prieschter droht mit Hellegwaale, wenn me nit bychtet, waas me drybt und niemerts frogt sich waas no bybt, wenn s letschte Stiindli gschaage het, die Antwoort findsch im Internet. Gäll, dänggsch jetzt au, s isch eppis draa: Statt Religion – Higgs Higgs Hurra!

Kai Froog, ych kaa mi arangiere, denn sälber haa-n-ych nyt z verliere. S hänn anderi die Geschichte geschriibe und mängmool zimftig iiberdriibe und drotzdäm wäär me gäärn derbyy miecht ych us Wasser guete Why und liesst sich soo gäärn vo mir daufe, damit me nie meh Why miesst kaufe. Waas ych derzue no saage kaa: Daas goot nit mit Higgs Higgs Hurra! Hit schloot me sich als aarme Dropf verzwyvlyfled s hailig Buech an Kopf. Zwaüdausig Joor lang yneglyvymt, vergäabe vor de Prieschter geschlymt: will d jetzt muesch saage: Gopferdeggel, me bruucht si nit, die falsche Seggel. Doo muess ych saage: S duet mer laid, daas haa-n-ych synerzyt scho gsait. Nur loost halt kain – daas isch bekannt – uff dr Prophet im aig'ne Land. Wie wäär s, dir föhnd vo Vooorne-n-aa? Statt Genesis Higgs Higgs Hurra! Nyt mee glaupe, alles wisse, kaa me s bewyysen, wiird nimm bschisse. Soo wiird die Wält zem Paradies und findsch dää Schluss e bitzli fies, denn nimm die letscht Woohred mit: E Fasnachtshimmel git s deert nit!

D Ladääne-Ausstellung uff em Minschterplatz und d Waage- und Reggwisyte-Ausstellung by dr Kasärne kaasch vom Määntig nacht bis am Mittwoch demoorge bsueche. Deert und an de 3 Verkaufsständ (CINS) in dr Stadt kaasch au alli Zeedel und Schnitzelbängg, d Blaggede und dr Rädäbäng kaufe.

Am Frytig und am Samschtig, 22. und 23. Hornig daarfsch die 1. Lektion im Zält uff em Barfi nit verbasse.

Am Sunntig noo dr Fasnacht, am 24. Hornig isch d Zaedelläsede vom Firmfi bis am Silibeni z Oobe in dr Baseldytsche Bihni im Lohnhof. S yne-luege kosched nit. Me kaa aaber eppis z Dinnge bschtelle